

Go hlweka go tšwa ka gare

Thero mo Mateo 15:11

Palo ya Beibele: Mateo 15:1-20

Temanathero: Mateo 15:11

Tabataba: Go hlweka go tšwa ka gare

Mo lengwalo la rena Morena wa rena Jesu Kriste o ka mo gare ga dipolelo le Bafarisei. Ke ka lebaka la taba ye e latelago. Jesu o re: seo se tsenago molomong wa motho ga se mo tšhilafatše, empa ke seo se tšwago molomong wa gagwe se mo tšhilafatšago. Jesu o bolela se mabapi le molao wa Bajuda wa go hlapa diatla pele ga ge ba eja. Bafarisei ba be ba balabala ka gore barutiwa ba Jesu ga ba latele setšo sa bona. Ka morago ga polelo ya Jesu, re bala gore Bafarisei ba ile ba kgopišega ka go kwa seo se bolelwago. Gobane go be go bonagala e ke Jesu o fediša se sengwe se bohlokwa seo e leng phapang magareng ga Bajuda le bantle. Bajuda ba be ba ikgogomoša ka setše sa bona kahlanong le bantle.

Empa ge Jesu a thoma go hlalošetša barutiwa ba gagwe: kotsi e kgolo mo go batho ka moka ga se seo se tšwago kantle – mohlala e ka ba seo o se jago, empa ke seo se tšwago ka gare ga motho! Seo o se jago, sea ka maleng gomme ka morago ga nako se tšwa mmeleng ge o e ya ntlwaneng. Bjale seo o se jago e ba selo sa bobedi. Empa sa mathomo ke boemo bjo bo lego ka gare ga gago! Ana pelo ya gago ke e bjang? Ana pelo ya gago ke sediba sa dilo tše mpe ka moka? Temana 19: gobane mo pelong go tšwa dikakanyo tše mpe, polao, bootswa, bohodu, bohlatse bja maaka, mekgwa e mebe... ana pelo ya gago e hlwekile? Ge pelo ya gago e hlwekile, o tlile go dira dilo tše botse. Empa ditumelo tše botse tše di hlomphegago di ka sego šireletše mo dilong tšeo di lego ka gare.

Jesu o bolela dilo tše ka moka kudukudu go barutiwa ba gagwe. O dira se go ba kgalema mo go bona le mo go rena ga se selo se sebotse go kgalemiwa. Empa go a hlokega. Gomme o gopole gore ge motho a go kgalemela maikemišetšo a gagwe e ka ba lerato la nnete, le go go širiletša, gomme bjale re bona ka mo Jesu a kgalemelago barutiwa ba gagwe. O ba botša nnete. Bjo ke boteng bja seo e lego molaetša wa Beibele. Gore o lemoga gore ga wa hlweka ka mo gare gomme o thome o nyake go hlwekišwa le go tšwa ka mo gare!

Batswadi bao ba humanego ngwana ba tseba ka dikotsi tšeo di ka hlagelago ngwana wa bona. Bjale ba tlile go mo šireletša ka nnete, ka go mo nea dijo tša maleba le go se mo iše mafelong ao a le go kotsi goba batho bao ba le go kotsi. Kudukudu bjalo ka ge setšo sa rena se nyaka bjalo, ba ka se ntšetše ngwana kantle ga ngwako pele go feta dikgwedi tše tharo. Gomme go ya ka setšo ba tlile go dira mediro (go hlabela) go šireletša boitekanelo bja ngwana. Dilo tše batswadi ba di dira gobane ba rata ngwana wa bona.

Le ga go le bjalo, ge re theetša mantšu a Jesu ao re a humanago mo temaneng ya rena, re swanetše go lemoga gore ga gwa lekana ka mo re šireleditšego ngwana. Le wena o ka be o dirile phošo. Gomme o lebetše selo se bohlokwa se segolo! Bjalo ka motswadi o ka lebelela dilo tšeo di thibelago dikotsi mo ngwaneng di etšwa kantle, gomme wa lebala kagohle gore kotse ye e lego gona e mo gare ga ngwana ka boyena! Bjalo ka ge mangwalo a re ruta bana ba rena ba tswaletšwe le go belegelwa mo sebeng. Seo ke nnete. Ka nako tšohle batswadi ba bona bana ba bona ba le bjalo ka mangeloi a hlwekilego a mabotse. Empa go madimabe ka ge go se bjalo. Seo Jesu a se bolelago temaneng – seo se ya go ka gare ga motho ga se mo tšhilafatše – nka di bitša ka re ke ditšwa – ntle. Nnete ye ga e bolele ka batho ba bagolo fela, empa e akaretša le bana!

Ge re tšwela pele go kolobetša bana, seo se na le molaetša o bohlokwa. Gobane ka go dira se re ipolela gore: bana ba le bona ba tšhilafatše, go tšwa ka mo gare! le bona ba tswaletšwe le go

belegelwa mo sebeng. Gomme seo se tlile go dula se le bjalo, ge ba sa hlwekiše mo moyeng ka mo gare ke Modimo! Go na le motho o tee fela yo a ka kgonago go hlwekiša motho ka mo gare. Gomme motho eo ke Modimo. Ke Jesu yo a hwilego mo sefapanong a hwela dibe le makgopo a rena, gomme bjalo bana ba ba tlile go kolobetšwa mo leineng la Modimo Tate, le Morwa le Moya o Mokgethwa. Gomme batswadi ba swanetše go tshepiša gore ba tlile go ruta bana ba bona nakong e tlogo lerato le thato ya Modimo, ba ba ruta go rapela le go kgopela tshwarelo ka mehla. Ka tsela yeo fela bana ba tlile go hlwatswiwa ka mo gare lebaka la go fetiša.

Nakong yengwe o kwa batho ba re: ge o ka bea ngwana, mo sehlakahlakeng a nnoši gore a golele gona a ka sebe le sebe. Gobane go ka sebe le batho bao ba mo huetšago ka dilo tše mpe. Le ga go le bjalo seo Jesu a se bolelago mo temaneng sefapana le se. Ge ngwana a gola mo sehlakahlakeng mo motho a sa mo huetšego ka tše mpe, mo go se nago ditsotsi goba badiradibe bao ba ka mo išago sebeng, le gona mo o tlile go gola e le modiradibe! Gobane le ngwana o tšhilafetše ka mo gare, pelo ya gagwe le yona a tšhilafetše, e bela dilo tše mpe ka gare ga yona. Seo ke nnete ya motho yo a wetšego sebeng! Gomme mo temaneng ya rena Jesu o bolela nnete. O tla go rena a bolela ka tšhilafalo ya rena, le a bana. A dire bjalo go re hlokofatša, empa gore thuša, ngaka ya nnete e tlile go go botša nnete, le ge e le gore o swanetše go go botša gore o lwala kudu. Gomme Jesu o lekola boemo bja meoya ya rena. Gomme o re lemoša gore re a lwala mo moyeng. Gomme re hwile. Empa ga a emiše fao, re leboga Modimo! Gobane o re neela sehlare: tshwarelo ya dibe leineng la gagwe, mpshafatšo ya maphelo a rena ka Moya o Mokgethwa! Gomme nnete seo ke sešupo sa kolobetšo. Ge ngwana a kolobetšwa, Jesu o tshepiša gore: o tlile go mo hlatšwa go tšwa ka mo gare, o tlile go mo nea Moya o Mokgethwa mo bophelong bja gagwe, gore a tle a be motho yo a itikanetšego yo a tshaba go Modimo!

Go bohlokwa bjang go kolobetšwa! Go bohlokwa bjang go amogela ditshepišo tše go tšwa go Morena wa rena Jesu! Ke selo se bohlokwa seo o ka se neelago ngwana wa gago.

Amene.